

25. nov.

Kalaallisut oqaatsitta qanoq tusagassiutini nukittorsarneqarsinnaanerannik qaffassarneqarsinnaanerannillu apeqquteqaat aallaavigalugu oqallisissiaq.

(Inatsisartunut ilaasortaq Mimi Karlsen, Inuit Ataqatigiit)

Siumumiit oqaatsitta pitsaasumik ineriartornissaat pingaartitaraarput soorluttaaq takusinnaagipput oqaatsitta ullumikkut killiffiisa nalilersornissaat pisariaqartoq. Oqaatsivut pillugit oqallinneq mianersortumik oqallisigineqartarpoq, tamanna qularutissaanngilaq oqaluttuarisaanitsinnimi aallaaveqartumik killiffeqarpoq.

Oqaatsit tassaapput inunnut attaveqaatit pingaaruteqartut nunamullu ataneqartut. Piumasaqaatit atorlugit inuiaqatigiittut naleqartitavut ineriartortinneqartarput, oqaatsivullu pineqartillugit takuneqarsinnaavoq qanoq killiffeqarnerisut.

Nunatsinni pisortatigoortumik oqaatsitta qanoq atorneqarnerat qanorlu malitsinneqarnerat equmaffigalugu malinnaavigineqartuartariaqarpoq taamaanngippat oqaatsit namminerisamik tammariartulersinnaasarmata.

Arajutsisimanngilarput innuttaasut akornanni oqaatsitta atorneqarnerat allanngoriartortut, tamanna pingaartumik inuusuttut akornanni ersarilluarpoq, naalisaanerit, allanngortitsilluni oqalunnerit il.il tusarsaapput assigiinngitsunilu nittartakkakkut tusagassiutini ersarittarluni. Tamanna immikkut aamma isummersorfigineqarsinnaavoq, taamaattorli kukkuissortumik oqaluttoqartillugu pingaaruteqarpoq ilitersuisoqartuarnissaq, naveersinata kisiannili oqaloqatigiilluta.

Oqaatsitta nukittunerisumik patajaannerisumillu inissisimanissaat suliassaavoq arlariinnik atanilerlugu ingerlattariaqartoq.

Oqartoqarsinnaavoq, nunarsuarmi aningaasarsiornikkut ineriartorneq ilutigalugu aamma oqaatsitigut ineriartorneq sunnigaasartoq. Nunani aningaasatigut ineriartorfiusuni oqaatsit pissaaninikkaluttuinnartarput, taamaattumik aamma oqartoqarsinnaavoq aningaasat illugalugit aamma oqaatsit imminnut unammiaartuusut. Allaaf ilaatigut, aammalumi nunatsinni oqaatsit aningaasanik uuttorneqartalersimapput, oqaatsivut akilersinnaanngitsutut isigineqartalersimallutik. Uffa nunatsinni innuttaasut amerlanerpaat kalaallisut oqaaseqartuusut, uffa kalaallisut oqaatsit tassaasut pisortatigut oqaatsit.

Inuttat ataasiakkaat Kalaallit Nunaanni najugaqartuusugut akisussaaffeqarpugut sutigut tamatigut timitalersueqataaniarnissatsinnik pisussaaffeqaratta, soorlu ulluinnarni oqaatsitsinnik atuinitsigut; perorsaanerimi, allagartalersuinerimi, nutserinerimi kalaallit oqaasiisa suillertut tunaartassatut inissitarnersigut il.il. Nunatsinni suliffeqarfii, pisortat pigisarippatigut namminersortuuppataluunniit amerlasuut kalaallisut allannissamik/sullissinissamik/allagartalersuinissamik il.il. pisussaaffilerneqanngikkunik danskisut ingerlatsisartut uparuarneqartuortaluarlutik inatsisiliuunneqarniaraluarlutik qanoq iliuuseqarumanninnerat oqaatsitsinnik suusupaginninnerminnik takutitsiinnartarput.

Taamaattumik oqaatsitta pisortatigoortumik atorneqarnerisa nukittorsarnissaat pisariaqarpoq, tamannalu pisortat pigisaanni suliffeqarfiusuni pingaaruteqarpoq pissusissamisoortutut isigalugu atortinneqartuarnissaat.

Ullumikkut oqaatsitsinnik oqalunnikkut allattariarsornikkullu atuisut killiffiisa takutippaat atuar-titaanikkut ilinniartitaanikkullu annerusumik nukittorsaasoqartariaqartoq, ilisimavarpummi meeqqat atuarfiini misilitsinnerni angusaasartut qiviaraanni qaffasissumik inissisimasartut, aperisariaqar-pugullu pitsaassuseq qanoq ittoq ilinniartitsissutigineqartarnersoq?

Pitsaassuseq qaffasissoq atuussimappat kukkunerit taamak amerlatigissanngikkalarput. Taamaat-tumik pingaaruteqarpoq killiffimmi nalilersuinerit ilisimatuussutsikkut aallaavillit ilanngullugit ingerlanneqarnissaat.

Naggasiutigalugu tusagassiuutit saqqummersittagaasa killiffiat arajutsisimanngilarput, naqitatigut nittartakkami saqqummersinneqartartut qiviaraanni qallunaatuinnaq annerusumik saqqummer-sitsisoqartartoq takuneqarsinnaavoq kingornalu, piffissaqarfigineqarsimappat, nutserneqarlutik kalaallisut saqqummersinneqartarlutik, taava aperisariaqarpugut pisortatigut oqaatsivut sumiinertut?

Tusagassiuutit tassaapput pissaanilissuit, taakkuupput inuiaqatigiinnut suut tusartinneqarnissaannik matuersaateqartitavut, taamaammat pingaaruteqarpoq politikikkut anguniakkat naleqartitallu tassuuna inissaqartinneqarnissaat ilaatigut immikkut siunnerfilerlugit ingerlatsivigineqartariaqartut.

Siumumiit taamak oqaaseqarlunga oqaluuserineqartumut oqalliteqataanissamut qilanaarpunga.

Suka K.Frederiksen
Siumut